

**Issittoq atomip nukinganik atuiffiunngitsoq pillugu politikkimik suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Sara Olsvig, Inuit Ataqatigiit)

**Akissuteqaat**

(Naalakkersuisut Siulittaasuut aamma Nunanut Allanut Naalakkersuisoq)

**Siullermeerneqarnera**

Inatsisartunut ilaasortaq, Sara Olsvig, Inuit Ataqatigiit, aalajangiiffigisassatut siunnersuummik matumanga saqqummiussinermigut Issittumi atomip nukinganik atuiffiunngitsoqarnissaanik ukkatarinninnera qutsavigaarput.

Atomip nukingata Kalaallit Nunaanni nukissiuutinik pilersuinermit atorneqarsinnaanera imaluunniit ilaatinneqarnissaa Naalakkersuisut kissaatiginngilaat. Tamanna ilutigalugu Naalakkersuisut ataqqaat - allanngortissinnaanngilaalluunniit - issittumi naalagaaffiit allat (imaluunniit naalagaaffiit suulluunniit) Issittumi atomip nukinganik aamma atomitigut teknologimik atuinerat.

Pingaaruteqarpoq, Inatsisartut piviusorsioortumik tunngaveqarlutik aalajangiisarnissaat. Aamma nunanut allanut ministeeriaqarfik januar 2014-imi nalilivoq, Issittumi atomimik sakkooqartoqannginnissaanik siunnersuut piviusorsioortuunngitsoq.

Assersuutigalugu USA, Canada aamma Rusland atomitortunik sikunik aserorterutaateqarlutillu sakkutuutut atortakkaminnik aqqartartuuteqarput. Kunngearfiutaaq Danmarkip 2006-imili nunaviup immap naqqatigut avalassaanganerata toqqavia pillugu pilersaarummut atasumik Issittup imarpiani ilisimasassarsiornerit arlallit ingerlassimavai. Tamanna nunat arlallit qanimut suleqatigalugit ingerlanneqarpoq. Soorlu angalaneq LOMROG I, russit sikunik aserorterutaat atomitortoq atorlugu ingerlanneqartoq. Kalaallit Nunaanni nunaviup immap naqqatigut avalassaanganerata toqqaviata allilerneqarnissaanut ikorfartuinermit tunngatillugu paasissutissanik katersinerup saniatigut, pingaartinneqarluinnarpoq suliasaqarfiit allat iluini ilisimatuussutsikkut malitseqartitsisumik allatut ilisimatusarneq.

Tassa suliarineqarput sermimit qillerilluni misissugassanik katersinerit, sikup issussusaanik uuttortaanerit, DNA tappiorannartullu pillugit misissugassat katersorneqarput, nunap sananeqaataa misissorneqarpoq, imarpiup naqqani nunap sananeqaataa misissorneqarpoq, planktonit uumasogatigiit ataqatigiinnerat misissorneqarpoq aamma kviksølvip akulerusimassusia uuttortarneqarpoq il. il.. Misissuinerit tamarmik danskit, kalaallit, svenskit amerikamiullu ilisimatusarfii suleqatigiillutik ingerlappaat, Issittullu imartaanik ilisimasaqarnerulernermik pilersitsillutik. Tamanna Kalaallit Nunaannut aamma kinguaariit tulliuttut nunap immikkoortuinik paasinninnissaannut iluaqutaassaaq.

Suliaq tamanna aamma 2011 – 2020-mut Kunngearfiup Issittumi Periusissiaani erseqqissarneqarpoq, periusissiaq Naalakkersuisut Danmark Savalimmiullu peqatigalugit atsiorpaat.

Naggataarutigalugu oqaatigerusuppara, siunnersuuteqartup Issittumi suleqatigiinnermik pingaartitsilluinnarnera tusaallugu nuannermat. Tamanna Issittup Kalaallillu Nunaata annertuumik

05-05-2014

UPA 2014/169

ukkatarineqarnerani aamma tutsuiginartunik peqateqarnissamik suleqateqarnissamillu  
pisariaqartitsiffitsinni pingaarutilipilussuartut isumaqarfigaara.

Taamaammat Naalackersuisut inassutigaat siunnersuut itigartinneqassasoq.